

# Bardill maina puspè ils uffants en la terra blaua dals miraculs

La terza cd d'uffants dal chantatur è uss sin fiera

■ (anr) Gimli ha il nanin num e ses meglier amitg è il «Doppelhas» che di adina tut duas giadas. Il nanin viva en la terra blaua dals miraculs. Cler, i dat blers che na crain betg che quest pajais existia. Ma a quels che crain enten la terra blaua dals miraculs explitgescha Bardill era co quest pajais vesa ora: Ins sto be serrar ils eglis e s'imaginar ina pizza blaua. Sisum èn las palis grondas ed il lai. Ed a travers la pizza va il flum blau. A sanestra èn ils culms e da vart dretga sa chatta il gaud da bulieus. Giudem il pajais è la mar. Amez il gaud da bulieus abitescha Gimli, il nanin. Lez è l'herox en set istorgias curtas da la nova cd «Gimli der Zwerg».

## Las verdads en la terra da miraculs

Ina spezialitad da las producziuns d'uffants da Bardill è ch'era creschids pon rir cun sias istorgias. E sch'ins taidla lura la segunda u terza giada ils tocs sent'ins ch'igl è bler dapli davostiers che be in simpel raquint. Daco ri ins sch'il urs Beltrametti ha quitados pli curios e fa tgutgarias? Fitg simpel, ils quitados e las tuppadads da la terra blaua èn exact ils medems sco quels en noss mund real.

In exempel: Doppelhas ha d'organisar la festa dal quachegiar da las raunas. El ha pia ina massa fastidis e crai ch'el na po segir betg durmir la notg. Quai enconuscha gea mintga organisatur. Il nanin Gimli sa exact: Sch'insatgi è agità na pon ins betg calmar el cun pretender ch'i na dettia nagina raschun da s'agitar.



Linard Bardill cuntinuescha cun la musica per uffants.

LQ

Uschia sto Gimli gidar ses ami Doppelhas en autra guisa. E Gimli agescha sco in psicolog experimentà. Doppelhas dorma la fin finala sco in tais la notg avant la festa.

## Era per uffants da scoletta

Mintgina da las set istorgias è tgemblada cun fantasia: Ina chandaila da glatsch marida ina flur ed i dat las pli bellas nozzas. Ils animals litgan gugent pischa da furmiclas che fa sguizias sin la lieunga. E tgi saveva che funtaunas dovrian mingatant compliments e laud per ch'ellas dettian adina buna aua frestga?

La terza cd d'uffants da Bardill ha in tut auter caracter che las duas emprimas. Tar «Luege was dr Mond so macht» sa tracti dad ina cd cun chanzuns per la quala *Lorenz Pauli* ha scrit ils texts. La segunda cd sa numna «Lieder und Geschichte us em Rucksack vom Andri». Lezza istorgia, sco era quella da Gimli, ha il chantatur fatg en collavuraziun cun radio DRS 1. L'istorgia dal pastur Andri sa drizza dentant plitost ad uffants da scola. La nova cd pon dentant gia uffants da scoletta chapir e gudair.

Linard Bardill: Gimli der Zwerg, cd 74321721602 (BMG Ariola)